

आकाशवाणी जयपुर—अजमेर

प्रादेशिक समाचार

दिनांक 21.05.2024

समय: 18.45 बजे

- पूरो प्रदेश ज़बरदस्त गर्मी अर लू ऊं झुलस्यो—मौसम विभाग आगामी तीन दिन और तेज लू बाजण सारू चेटायो ।
- लोकसभा चुणाव रा पांचवां दौर मांय काल साठ फीसदी ऊं मतदाता वोट दीना ।
- प्रदेश ऊं हज़ रा मुकद्दस सफर माथे जावण वाळां री पैली उड़ान आज जयपुर ऊं जेद्दाह गयी—ई दफ़ा करीब 4 हजार लोग हज़ सारू जावेला ।
- श्रीगंगानगर ज़िला मांय ई दफ़ा सरकारी मोल माथे गेहूं री दूणी खरीद करी ज्यी ।

000

पूरो प्रदेश ज़बरदस्त गर्मी अर लू रा कोप ऊं परेशान है । लारला एक सप्ताह ऊं घणखर ठौड़ां पारो सामान्य ऊं चार ऊं पांच डिग्री सेल्सियस ऊंचो चाल रह्यो है । जयपुर समेत राज्य रा घणखर ज़िलां मांय पारो 45

ऊं 47 डिग्री सेल्सियस बीचे माप्यो जा रह्यो है। दिन सागे रात री बगत ई पारो सामान्य ऊं तीन ऊं चार डिग्री सेल्सियस ताई ऊंचो चाल रह्यो है। चूरु मांय तेज गर्मी ऊं बचाव सारु सड़कां माथे पाणी रो छिड़काव करी ज्यो। वठे आवारा ढांढा ने गौशाला मांय भिजवा र वां रा चारा पाणी री व्यवस्था करी जा रही है। पेश है म्हाणा खबरनवीस री रपट—

बीकानेर मांय जिला कलेक्टर नम्रता वृष्णि सगळा सरकारी दफतरां ,स्कूलां, अस्पतालां अर बस स्टेण्ड समेत न्यारी-न्यारी ठौड़ां पीवण रा पाणी री व्यवस्था तैय करण रा हुकम दीना है। **दौसा** मांय यातायात पुलिस कर्मचारियां ने गर्मी ऊं बचावण सारु दोपहरां री बगत एनर्जी ड्रिंक अर छतरियां मुहैया करायी जा रही है। शहर मांय पड़ रही जबरदस्त गर्मी रे कारण संवारे 9 बज्यां पाछे ई बाजार सूना निजर आवण लाग्या है। लू अर गर्मी ने ध्यान राखता थकां झालावाड़ मांय चंद्रभागा नदी कने भरण वाळो राज्य स्तर रो पशु मेळो टाळ दियो ज्यो है।

जैसलमेर मांय ई जोरदार गर्मी रे कारण दिन मांय कपर्यू सरीखा हालात निजर आवण लाग्या है। **भरतपुर** मांय सड़कां माथे पाणी रो छिड़काव करी ज्यो, हालाकि सिंज्यां री पोर छांटो-छिड़को व्हेवण ऊं गर्मी ऊं थोड़ी साता मिली। **सलूंबर** मांय जिला कलेक्टर शहरी अर गांवाई हलकां रो दौरा कर र पीवण रा पाणी री पूर्ति री व्यवस्था रो जायजो

लीनो। वे जनता ऊं पाणी री बर्बादी रोकण री अपील ई कीनी। **अजमेर** मांय ई ज़िला कलेक्टर पाणी री पूर्ति री व्यवस्था रो जायज़ो लीनो।

भीलवाड़ा मांय ई ज़िला कलेक्टर अहलकारां री मीटिंग ले र पीवण रा पाणी अर ईलाज रा सुबीता ऊं जुडी व्यवस्थावां चाक चौबंद राखण रा हुकम दीना है। **करौली** ज़िला मांय ई ज़ोरदार गर्मी ऊं मौसमी बीमारियां रा मरीज़ां री तादाद बध रही है। ज़िला मांय ज़रूरत पड़्यां टैंकरां रे ज़रिए पीवण रा पाणी री पूर्ति तैय करी जा रही है। **बाड़मेर** मांय पड़ रही ज़बरदस्त गर्मी ऊं जिंदगी माथे घणो असर पड़ रह्यो है। **उदयपुर** मांय ई तेज़ गर्मी अर उमस सागे उल्टी—दस्त रा मरीज़ां री तादाद बध रही है। **सवाईमाधोपुर** मांय **एक परिण्डा मेरा भी** अभियान रा तैत दशहरा मौदान मांय पंछियां सारू परिण्डा बाध्यी ज्या। मौसम केंद्र जयपुर आवता तीन—चार दिन प्रदेश मांय ऐडो ई मौसम रेहवण रा आसार जताया है। केंद्र रा निदेशक राधेश्याम शर्मा बतायो के आवता तीन दिन घणी जबरदस्त लू बाजण री शंका है।

000

लोकसभा चुनाव रा पांचवां दौर मांय काल 60 फीसदी ऊं बत्ता मतदाता वोट दीना। ई दौर मांय उत्तर प्रदेश री 14, महाराष्ट्र री 13, पश्चिम बंगाल री 7, ओडिसा अर बिहार री 5—5, झारखंड री 3 अर जम्मू—कश्मीर अर लद्दाख री 1—1 सीट सारू वोट पड़्या। ई दौर रा चुनाव मांय छह सौ 95 उम्मीदवारां रो सियासी भाग ईवीएम मांय बंद

व्हे ग्यो। जम्मू-कश्मीर रा बारामुला मांय 56 दशमलव सात-तीन फीसदी वोट पड्या जो लारला 35 साल मांय सब ऊं बत्तो मतदान प्रतिशत है। लद्दाख मांय 69 दशमलव छह-दो फीसदी मतदाता वोट दीना। पांचवां दौर रा वोट पड्यां पाछे हाल ताई 25 राज्यां मांय लोकसभा री चार सौ 28 सीटां सारू मतदान रो काम पूरो व्हे ग्यो। अरुणाचल प्रदेश, सिक्किम, आंध्रप्रदेश अर ओडिशा मांय 63 विधानसभा सीटां सारू ई वोट पड्या।

000

पैली वाळा प्रधानमंत्री राजीव गांधी ने आज वां री बरसी रे मौके सिरधा भाव सागे याद कर्या जा रह्या है। आतंकी संगठन एलटीटीई 21 मई,1991 ने चेन्नई कने श्रीपेरम्बुदूर मांय आत्मघाती बम हमला मांय राजीव गांधी री हित्या कर दीनी ही। राजीव गांधी री बरसी रे मौके प्रदेश मांय ई केई कार्यक्रम राख्यी ज्या। ई मौके प्रदेश जयपुर मांय प्रदेश कांग्रेस रा मुख्यालय माथे सर्वधर्म प्रार्थना सभा राख्यी ज्यी, जिण मांय केई धर्मगुरु धार्मिक ग्रन्थ बांच्या। सर्वधर्म प्रार्थना सभा मांय गिरिराज बालोदिया भजन पेश कीना, कारी अब्दुल रशीद कुरान री आयतां बांच्यी, सरदार मनिन्दर सिंह बग्गा गुरबाणी अर फादर विजय पॉल बाईबल रो पाठ कीनो। **पाली** रा राजकीय बांगड़ अस्पताल मांय खूनदान शिविर लगायी ज्यो। **अजमेर** मांय राजीव सर्किल परां राजीव गांधी री मूरत माथे फूल चढा र राजीव गांधी ने याद करी ज्या। वठे रा राजस्थान ब्लड सेंटर मांय खूनदान शिविर लगायी ज्यो। **भरतपुर** मांय

संगोष्ठी राख र राजीव गांधी रा शख्सियत अर वां रा काम ने याद करी ज्यो। करौली, शाहपुरा, केकड़ी ज़िला रा टोडारायसिंह अर सवाईमाधोपुर मांय ई राजीव गांधी ने सिरधाभाव सागे याद करी ज्यो। बारां मांय श्रद्धांजलि सभा राख र राजीव गांधी ने याद करी ज्यो। टोंक मांय ई विचार गोष्ठी राखी ज्यो। जैसलमेर मांय मौन राख र राजीव गांधी ने याद करी ज्यो। उदयपुर मांय ई राजीव गांधी री बरसी आतंकवाद विरोधी दिवस रा तौर ऊं मनायी ज्यो। बूंदी मांय खूनदान शिविर लगायी ज्यो।

000

जयपुर रा सांगानेर हवाई अड्डा ऊं प्रदेश ऊं हज़ रा मुकद्दस सफर सारू जावण वाळां री पहली उड़ान 433 मुसाफिरां ने ले र आज सऊदी अरब रा जेद्दाह सारू रवाना व्ही। जयपुर हवाई अड्डा ऊं 27 मई ताई प्रदेश रा करीब 4 हजार हज यात्री मदीना सारू उड़ान भरेला। मई महीना मांय 9 उड़ानां सीधी मदीना जावेला।

000

श्रीगंगानगर मांय एफसीआई हाल ताई सरकारी मोल माथे 8 मीट्रिक टन ऊं बत्ता गेहूं री खरीदी कीनी है। वठे 30 जून ताई 12 लाख मीट्रिक टन गेहूं की खरीदी करणो तैय करी ज्यो है। हाल ताई 72 हजार 2 सौ ऊं बत्ता काश्तकारां ऊं गेहूं री सरकारी मोल माथे खरीदी करी ज्यो है। पेश है म्हाणा खबरनवीस री रपट—

.....

एफसीआई रा डिविजन प्रबंधक अभिरित चौधरी बतायो के श्रीगंगानगर मांय लारला साल री तुलना मांय ई साल दूणी ऊं बत्ती खरीदी करी ज्यी है। काश्तकारां ने बोनस समेत 2 हजार 400 रूप्या प्रति क्विटल रा हिसाब ऊं चुकारो कर्यो जा रह्यो है।

000

बूंदी जिला रा रामगढ़ विषधारी टाईगर रिजर्व रा कोर पोर हलका मांय बस्योडा गांवां ने दूजी ठौड़ बसावण रे कारण मुआवजा सारू दाखिल करी ज्यी अर्जियां परां मुआवजा री कार्यवाही बेगी ई करी जावेला। जिला कलेक्टर ई बाबत् हुकम जारी कीना है। वे अहलकारां ने संबंधित गांवां मांय जा र दूजी ठौड़ बसावण सारू गांव वाळां ने बेहतर तरीका ऊं समझावण बाबत् कह्यो।

उप वन संरक्षक संजीव शर्मा बतायो के दूजी ठौड़ बसाया जावण वाळां रा सामाजिक अर माली सर्वे रो काम पूरो कर लियो ज्यो।

000

राज्य मांय चिकित्सा अर स्वास्थ्य विभाग री ओर ऊं चलाया जा रह्या "शुद्ध आहार मिलावट पर वार " अभियान रा तहत न्यारी-न्यारी ठौड़ां कार्रवाई करी जा रही है। भरतपुर जिला रा बयाना मांय एक गोदाम ऊं 330 किलोग्राम नकली देशी घी सीज करी ज्यो। इसके अलावा मिठाइयों की दुकान पर भी कार्रवाई की गई। भीलवाड़ा मांय ई मिलावटी व्हेवण री शंका मांय पौने पांच सौ लीटर घी सीज करी ज्यो।

शक्ति दिवस अर एनीमिया मुक्त राजस्थान कार्यक्रम रा तैत **दौसा** ज़िला मांय चिकित्सा विभाग मनरेगा रा तैत कमठाणा माथे काम करण वाळा मजूरां ने लू ऊं बचाव सारू राहत किट मुहैया कराई। ई मौके मजूरां ने साथ ही लू अर कुपोषण ऊं बचाव रा बारा मांय ई जाणकारी दीरीजी। **पाली** जिला मांय सुमेरपुर रा आंगनबाड़ी केंद्र मांय महिलावां मांय जाग जगावण सारू अन्नप्राशन रो कार्यक्रम राख्यी ज्यो। कार्यक्रम मांय पौष्टिक आहार, माँ रा दूध री ज़रूरत, पूरक आहार रा बारा मांय जाणकारी दीरीजी। ई सारू आंगनबाड़ी केंद्र मांय रंगोली बणायी ज्यी अर पौष्टिक आहार रा समान सजायी ज्या। सवाईमाधोपुर ज़िला मांय ई जिला चिकित्सालय, सगळा सामुदायिक स्वास्थ्य केन्द्रां, प्राथमिक स्वास्थ्य केन्द्रां अर हैल्थ वेलनेस सेंटरां परां आस वाळी अर दूध पावण वाळी महिलावां अर नौजवान युवतियां री हीमोग्लोबिन जांच कर कर र वां ने आयरन री गोळियां दीरीजी। कोटपुतली-बहरोड ज़िला रा पावटा ब्लॉक मांय सेंटर फॉर फाइनेंसियल लिटरेसी परियोजना रा तैत वित्तीय साक्षरता कार्यक्रम राख्यी ज्यो। कार्यक्रम मांय रिजर्व बैंक ऑफ इंडिया कानी ऊं चलायी जा रही योजनावां रा बारा मांय जनता ने जाणकारी दीरीजी।